



Broj: 05-05-11772/12 III
Sarajevo, 11.05.2012.godine

SKUPŠTINA KANTONA SARAJEVO
n/r Prof.dr. Mirjana Malić, predsjedavajuća

PREDMET: Odgovor na poslaničko pitanje

Zastupnica Selma Filipović, na Četrnaestoj Radnoj sjednici Skupštine Kantona Sarajevo, održanoj dana 23.04.2012.godine, u okviru tačke Dnevnog reda «Poslanička pitanja, inicijative i odgovori», ističući da je pravilno i neškodljivo uklanjanje medicinskog i biološkog otpada jedna od važnijih obaveza na našem putu u EU, a imajući u vidu moguće štetne posljedice po zdravlje ljudi, mogućnosti zagađenja tla i vodotoka, u slučaju da se isti ne odlaže i ne uništava na neškodljiv način, postavila je zastupničko pitanje:

PITANJE:

«Na koji način i u skladu sa kojim normama i standardima se vrši deponovanje i neškodljivo uklanjanje medicinskog i biološkog otpada u Kantonu Sarajevo?»

ODGOVOR:

Zakonom o upravljanju otpadom Federacije BiH („Službene novine Federacije BiH“ br. 33/03 i 72/09) propisano je upravljanje svim vrstama otpada, pa i medicinskim otpadom. U skladu sa Pravilnikom o upravljanju medicinskim otpadom („Službene novine Federacije BiH“ broj 77/08), medicinski otpad je otpad koji se proizvodi u zdravstvenim ustanovama i koji je obuhvaćen Pravilnikom o kategorijama otpada sa listama („Službene novine Federacije BiH“, broj:9/05), a zdravstvena ustanova je, između ostalog, svaka javna ili privatna bolnica, ambulanta, dom zdravlja, stomatološka ordinacija, domovi za stara i iznemogla lica, apoteke, mrtvačnice, veterinarske stanice, centri za biološko istraživanje, koje su odobrene od strane ministra javnog zdravstva.

Uspostavu adekvatnog sistema zbrinjavanja medicinskog otpada u Kantonu Sarajevo, je iniciralo Ministarstvo prostornog uređenja i zaštite okoliša, još 2000.godine. Naime, prilikom izrade Strategije upravljanja industrijskim i specijalnim otpadom, konstatovano je da velike količine infektivnog otpada, bez ikakvog tretmana završavaju na Deponiji komunalnog otpada «Smiljevići».



Prema Planu implementacije Strategije, 2004.godine Ministarstvo zdravstva Kantona Sarajevo pripremio je Projekat upravljanja medicinskim otpadom. Prioritet rješavanja u projektu dat je infektivnom otpadu, s obzirom da je najzastupljeniji u sastavu kompletnog medicinskog otpada i nije se ni na kakav način tretirao. Nabavkom 3 uređaja za sterilizaciju infektivnog medicinskog otpada od strane Ministarstva zdravstva, stvoren je minimum uslova za adekvatno postupanje sa infektivnim otpadom. Procedura tretmana infektivnog otpada podrazumijeva sterilizaciju i dezinfekciju, i nakon toga se otpad melje da bi se učinio neprepoznatljivim i smanjila njegova količina. Nakon provedene sterilizacije, otpad je neopasan i odlaže se na deponiji «Smiljevići» sa ostalim komunalnim otpadom. Što se tiče patološkog otpada, isti preuzima KJKP «Pokop», koji otpad odvozi i zakopava, dok se hemijski otpad iz zdravstvenih ustanova zbrinjava putem operatora ovlaštenih za prikupljanje opasnog otpada.

Prema Zakonu o upravljanju otpadom, za obavljanje aktivnosti tretmana otpada potrebno je pribaviti dozvolu. U Kantonu Sarajevo do danas su izdate dvije dozvole za tretman medicinskog otpada. Ministarstvo prostornog uređenja i zaštite okoliša je izdalo dozvolu za aktivnosti tretmana otpada 14.11.2008.godine, Kliničkom centru Univerziteta u Sarajevu za postrojenje za tretman infektivnog medicinskog otpada, za godišnju količinu od 30 t infektivnog otpada. Opća bolnica «Prim. dr. Abdulah Nakaš» je 15.10.2010.godine dobila dozvolu za upravljanje otpadom za godišnji kapacitet od 40 t otpada. U svom postrojenju za tretman infektivnog otpada Opća bolnica, pored otpada iz vlastitih klinika, preuzima i otpad iz 53 druge zdravstvene ustanove sa područja Kantona Sarajevo.

U 2012.godini Ministarstvo prostornog uređenja i zaštite okoliša je odobrilo 170.000,00 KM Kliničkom centru za «Projekat zbrinjavanja infektivnog medicinskog otpada » iz sredstava doznačenih od Federalnog fonda za zaštitu okoliša. Navedeni iznos će se utrošiti za nabavku još jednog uređaja za sterilizaciju infektivnog otpada, čime će se unaprijediti sistem zbrinjavanja medicinskog otpada u ovoj zdravstvenoj instituciji.

Pravilnikom o upravljanju medicinskim opadom (“Službene novine Federacije BiH” broj 77/08) je definisana obaveza zdravstvenih ustanova da pripreme plan upravljanja medicinskim otpadom i dostave ga Ministarstvu prostornog uređenja i zaštite okoliša na odobravanje. Plan mora sadržavati vrste otpada, količine i odredište, odnosno podatke o operatoru sa kojim je sklopljen ugovor o preuzimanju otpada.

Ministarstvo prostornog uređenja i zaštite okoliša je odobrilo planove upravljanja medicinskim otpadom za 27 zdravstvene ustanove na području Kantona Sarajevo.

Može se zaključiti da stanje u upravljanju medicinskim otpadom u Kantonu Sarajevo, iako je vidljiv značajan napredak u odnosu na stanje prije deset godina, nije zadovoljavajuće. I dalje se sa velikim količinama medicinskog otpada nekontrolisano postupa, što predstavlja kako okolišni, tako i higijensko-epidemiološki problem.

Ovo stanje se može poboljšati većim razdvajanjem otpada na mjestu nastanka, kako bi što manju količinu otpada trebalo tretirati i plaćati za njegovo zbrinjavanje, pojačanim inspeksijskim nadzorom, nabavkom uređaja za sterilizaciju (autoklava) za sve veće medicinske ustanove, kao i edukacijom osoblja koje dolazi u dodir sa medicinskim otpadom.



web: <http://mpz.ks.gov.ba>

e-mail: mpz@mpz.ks.gov.ba;

Tel: + 387 (0) 33 562-086, Fax: + 387 (0) 33 562-177
Sarajevo, Reisa Džemaludina Čauševića 1



S tim u vezi, potrebno je dograđivati, odnosno uspostaviti cjelovit sistem upravljanja ovom vrstom otpada, za što su nužna značajna finansijska sredstva.

Za razliku od medicinskog otpada koji nastaje kod zaštite zdravlja ljudi, za koji postoji relativno zadovoljavajući način zbrinjavanja, veterinarski otpad predstavlja veliki neriješen problem Kantona Sarajevo, te je potrebno hitno preduzeti mjere na uspostavi sistema upravljanja životinjskim otpadom, a u skladu sa propisima koji regulišu veterinarsku djelatnost i upravljanje otpadom.

S poštovanjem,

MINISTAR

Abid Jusić,dipl.pravnik

Dostaviti:

- Naslovu
- Evidencija
- Arhiva



web: <http://mpz.ks.gov.ba>
e-mail: mpz@mpz.ks.gov.ba;
Tel: + 387 (0) 33 562-086, Fax: + 387 (0) 33 562-177
Sarajevo, Reisa Džemaludina Čauševića 1

